

Observatio critica in Regulam sequentem.

Quemadmodum S. Casarius duas Regulas composuit, sic etiam & S. AURELIANUS, itidem Arelatensis Episcopus, non proximus S. Casarii successor; inter utrumque enim hanc sedem Archiepiscopalem per paucos annos gubernavit Auxanius. Duo monasteria ordinavit, unum pro Viris, alterum pro sacris Virginibus, pro quibus & binas Regulas condidit. Hoc autem Virorum canobium Childebertus Francorum Rex condidit, donisque regis locupletavit; quemadmodum & Vigilius Papa in suam specialem protectionem suscepit. Sic enim testatur S. Gregorius M. supra citatus, ubi vividum exemplum exemptionis à jure Episcopali habemus, ab ipso Episcopo ordinario impetrata. Hanc igitur Monachorum Regulam scripsit S. AURELIANUS immediate post adeptum Episcopatum, circa nimirum annum DXLV.; sub initio enim hujus anni creatus est Archiepiscopus Arelatensis, obiitque annò DLV. Habet quidem ipsa Regula magnam connexionem cum S. Casarii Regula: nam ordo divini Officii verè idem est in utraque; fusior tamen est altera, complectens LV. capita, præter præscriptum psallendum, atque particularem ciborum & potus ordinem in refectorio observandum.

INCIPIUNT CAPITULA REGULÆ S. AURELIANI
E P I S C O P I.

1. Si quis ad conversionem venerit, Regula ei in salutorio legatur.
2. Ut usque ad mortem suam de Monasterio non egrediatur.
3. Vestimenta religiosa non accipiat, nisi charitas de facultate sua cui voluerit faciat.
4. Ut qui in Monasterio tonsuratur, de capillis illius in confessione mittatur: & nihil sibi reservet, quod non potestatem Abbatis tradat.
5. Nihil occultè accipiendum, sed si quid transmissum fuerit, & si illi cui transmittitur non necesse fuerit, in commune redactum cui est necessarium tribuatur.
6. Epistolas nec dandas nec accipiendas sine scientia aut permisso Abbatis.
7. Nullus circa lectum suum quod manducari aut bibi possit reponat.
8. Nullus cellam aut armariolum peculiare habeat.
9. Non jurandum omnino.
10. Non maledicendum.
11. Non mentiendum.
12. Iracundiam penitus non tenendam.
13. Frater in fratrem manum non mittat.
14. Laici in Monasterium vel Basilicam non ingrediantur, nisi tantum in salutorium.
15. Mulieres penitus nunquam nec in salutorio vidende.
16. Nulli Monachorum liceat ad salutandum exire, nisi cum Præposito, aut quolibet seniore.
17. In Monasterio non minore aetate excipiantur nisi ab annis decem. aut duodecim.
18. Servus non excipiat; libertus tamen si est, & Abbati visum fuerit, excipiat.
19. Ut nec ipsis provisoribus, liceat in Monasterium introire, nisi pro his utilitatibus, quas in hac Regula statuimus.
20. Infantes de baptismo non excipiendos.
21. Qui in actum ponuntur, desuper in Evangelio claves accipiant.
22. In omni ministerio vicibus sibi succedant, absque Abbate, & sacris senibus, & parvulis infantibus.
23. Nulla opera pro suo libito eligant facienda; sed quod ab Abbate vel Præposito imperatum fuerit.
24. Cum operantur manibus meditatio sancta de corde non cesserit.
25. Sint vobis omnia communia, & nullus suum proprium dicere aut vindicare presumat.
26. Vestimenta alio colore non induantur nisi laia & laetina, & nigra nativa.
27. Lectuaria secularia non utenda, & de ornatu Monasterii.
28. Post matutinas ad somnum reverti non liceat.
29. In vigiliis studendum ut nemo dormiat; sed manibus aliquid operentur.
30. Signo tacto nullus rarius veniat.
31. Dum psallitur nemo loquatur, nec operentur manibus.
32. Literas omnes Monachi discant.
33. Omnes divisis maneant lectulis.
34. Sanctus Abbas in Congregatione maneat.
35. Nulli liceat soli cum solo loqui: quod si inventi fuerint, gravissima districtione feriantur.
36. Cum eo qui excommunicatus fuerit nemo loqui presumat.
37. Ut obediendum sit præpositis.
38. Si quis pro qualibet culpa corrigitur aut castigatur, arguenti respondere non presumat.
39. Lites non habeatis ullas.

40. Superbis, inobedientibus, & iracundiam praeferentibus nunquam parcendum.
41. Pro qualibet culpa legitimus numerus non excedatur.
42. Quomodo paternum affectum qui praesunt circa omnes habeant.
43. Sancto Abbati non liceat de facultatibus Monasterii vendere, aut donare; nec aliquid contra Regulae instituta agere.
44. Quod superfluum est Monasterii, per provisorum pauperibus dispensetur.
45. Vestimenta vetera Abbati refundantur pauperibus eroganda.
46. Honorem nullus accipiat, nisi qui Deo propitio Sacerdotio dignus fuerit eligi, ipse solus egrediatur.
47. Ut minoris aetatis chartas facere compellantur, quando aetate probati fuerint.
48. Convivium nulli alii preparandum nisi advenientibus peregrinis & servis Dei.
49. Sedentes ad mensam taceant.
50. Sanctus Abbas extra Congregationem non reficiat.
51. Carnes in cibo nunquam sumantur. Pulli vero & reliqua alia infirmis tantum ministrentur, pisces vero certis festivitibus.
52. Extra mensam communem nihil cibi potusve gustare liceat, nisi infirmis & infantibus.
53. Qualiter infirmis obtemperandum sit.
54. Ut sanctus Abbas quidquid necesse cum sufficientia praebeat.
55. Ut sancta Congregatio omnia quae instituta habet, implere contendat.

Explicunt Capitula.

INCIPIT PROOEMIUM REGULÆ S. AURELIANI EPISCOPI

*Sanctis & Christo venerandis fratribus in Monasterio, quod Deo miserante ac jubente Rege Childeberto fecimus, constitutis,
AURELIANUS EPISCOPUS.*

Quia Deo inspirante, qui nos praevenit ineffabili misericordia sua, visum nobis est, ut repudiatis saeculi voluptatibus, ac temporalibus gaudiis contemptis simul vel spreto, eligeretis sanctissimae vitae nitorem, & virginitatis ac castitatis gratiam complectentes, amore Dei tota viscerum & cordis aviditate sectantes, configere timore Dominico carnes vestras, & dicere illud:

Psalm. 118. Juravi & statui custodire iudicia iustitiae tuae.

Et, mihi mundus crucifixus est, & ego mundo, Gal. 6. disposuimus jubente Domino, atque operante in nobis velle & perficere, ut Monasterium (*) vobis pro profectu animarum vestrarum construeremus, sicut & fecimus. Et ideo Regulam vobis ac disciplinam instituimus, quae vos ad viam perfectionis recte faceret gradiri, & ad regna caelorum feliciter pervenire.

Explicit Prooemium.

INCIPIT INSTITUTIO SANCTÆ REGULÆ.

CAPUT PRIMUM.

Hoc jubente Deo imprimis statui-
mus tenendum, ut si quis ad
conversionem venerit, Regula ei
in salutorio legatur; & si professus

fuerit se omnia impleturum, tunc excipiat.

II. Exceptus vero usque ad mortem suam nec praesumat, nec permittatur de Monasterio egredi; propter illud Propheticum; *Unam petii à Domino, hanc requiram,* Psalm. 26

(*) Monasterium hoc ARELATENSE à S. AURELIANO extractum fuit in honorem S. Crucis: de quo Cardinalis Baronius agit ad annum Christi 553. satis tamen haesitante; quod clarioribus documentis destitueretur. Sed epitaphium illud S. Florentini primi Abbatis exacte congruit cum nota illa temporis, quae Regulae subjungitur. Nam monasterium fundatum fuit anno Christi 548. sub finem anni. Huic Florentinus praefuit primus Abbas annis quinque, hoc est usque in pridie idus Aprilis anni 553. ut inscriptio ejus sepulchralis testatur apud Baronium hoc aed. numero ultimo, quae & Redempti & Constantini successorum ejus meminit. Ex hac autem Regula apparet, non ab Hilario Archiepiscopo, sed ab AURELIANO monasterium extractum fuisse. Hic enim Auxanio successit anno Christi 546. Hilarius autem integro saeculo ante vixerat. Obiit enim, teste Prospero, anno vigesimo sexto Theodosii junioris, qui fuit Christi 433.

quiram, ut inhabitem in domo Domini omnibus diebus vite mee.

III. Vestimenta verò religiosa non accipiet, nisi de omni facultate sua, sive grandi sive parva, chartas donationis aut venditionis cui voluerit faciat: propter

Matth. 19. Domini mandatum, ubi dicit: *Si vis perfectus esse, vende omnia quae habes.* Et,

Luc. 14. *si quis non reliquerit omnia quae possidet, non potest esse meus discipulus.*

IV. Si quis laicus tonsurandus est, de capillis illius in confessione mittatur, ut ei in testimonio sit. Quod si tonsuratus, aut in habitu religioso venerit, non excipiat, nisi ut superius diximus, chartas de eo quod proprium in saeculo habuerat, faciat; ut nihil sibi reservet, quod non à se alienet: & id quod secum exhibuerit, omnia in potestatem tradat Abbatis, timens exemplum Ananiae & Saphirae, qui partem obtulerunt, partem sibi infideliter reservaverunt

A&. 5.

V. Nihil occultè accipiatis: sed si quis propinquus aut amicus aliquid in vestimento, aut in auro, vel aliud quodcumque dederit aut transmiserit, in potestate sit Abbatis: & si illi cui transmittitur necesse fuerit, tribuatur; sin verò ille nihil indiget, in commune redactum cui necessarium est tribuatur.

VI. Epistolas praecipuè nec dandas nec accipiendas sine scientia aut permissio Abbatis.

VII. Nullus circa lectum suum, quod manducare aut bibere possit, reponere praesumat; sed omnes in communi cellario recondant: & si inaequalitas exegerit, iubente seniore quod necesse fuerit non ei negetur.

VIII. Nulli liceat cellam aut armariolum, aut aliquid hujusmodi quod peculiariter claudi possit, habere.

Matth. 5. Non juretis: quia Dominus dixit: *Nolite jurare.* Et alia scriptura: *Vir multum jurans implebitur iniquitate; & non discedet de domo illius plaga.*

Eccel. 23.

X. Non maledicatis: quia scriptum est: *Neque maledici regnum Dei possidebunt.*

1. Cor. 6.

XI. Mentiri omnino non liceat; quia

Sap. 1. *os quod mentitur occidit animam,* & illud: *Perdes eos qui loquuntur mendacium.*

Psalm. 5.

XII. Iracundiam nullus usque in aliam diem protrahere praesumat, quod si, ut habet humana fragilitas, sermo durior inter fratres ortus fuerit, invicem sibi veniam petere, & debita relaxare debent, propter Domini mandatum, ubi dicit: *Si recordatus fueris, quia frater tuus habet aliquid adversus te, relinque munus tuum ante altare, & vade prius reconciliari fratri tuo: & tunc veniens offerre munus tuum.* Et, *si non dimiseritis hominibus peccata eorum, nec Pater vester caelestis*

Matth. 5.

Matth. 6.

dimittet vobis peccata vestra. Item: *Si Luc. 17. septies in die peccaverit in te, & conversus dixerit: penitet me; dimitte illi.* Et, non *Matth. 18. dico tibi usque septies, sed usque septuagies septies.* Et alia scriptura: *Ira enim viri Jac. 1. justitiam Dei non operatur.* Et Apostolus: *Sol non occidat super iracundiam vestram, Ephes. 4. Quod si, quod Deus avertat, diabolo instigante ita fuerit quis furore repletus, ut ista mandata pertinaci corde contemnat, & unus de illis qui discordantes sunt praevenerit alium, veniam ei petent; si ille cui petit non dimiserit, legitimam disciplinam accipiat, ut ad charitatem se corrigat. Quod si ambo despexerint, ambo pariter à communione, vel à cibo suspendantur, donec invicem sibi reconcilientur.*

XIII. Frater in fratrem si ausus fuerit manum mittere, legitimam disciplinam accipiat.

XIV. Nullus laicus, sive nobilis sive ignobilis, in Basilicam sive Monasterium introire permittatur: si quis pro devotione aut parentela occurrere voluerit, in saluatorium Monasterii occurrat.

XV. Mulieres verò, nec religiosae nec saeculares, nullae omnino, nec Abbatis, nec cujuscunque Monachi mater, aut quaelibet propinqua aut nota ad salutandum, aut ad orationem ingredi permittatur; Domini & Magistri sequentes exemplum, cum dicit: *Et quae est mater mea, & fratres mei?* Et illud: *Si quis non reliquerit patrem aut matrem, non potest meus esse discipulus.* Et alia scriptura: *Qui dixerunt patri & matri, non novimus vos, hi custodierunt praecepta sua Domine.*

XVI. Ipsi verò laicis viris, quibus permittum dedimus occurrendi, nullum unquam Monachorum sine Abbate aut Praeposito, vel certè alio quocumque seniore, cui Abbas praeeperit, videant aut loquantur; nec unquam altiore voce loquantur.

XVII. Minori aetate in Monasterio non excipiantur, nisi ab annis decem aut duodecim, qui & nutrir non egeant, & cavere noverint culpas.

XVIII. Servus non excipiat: libertus tamen, si fuerit adhuc adolescenti aetate; & cum Epistolis patroni sui venerit, in Abbatis sit arbitrio si excipi debeat.

XIX. Provisores verò Monasterii si in habitu laico fuerint, nec ipsi permittantur intrare; pro his utilitatibus, quas in hac regula statuimus, cum marcionibus aut carpentariis, si aliquid necesse est fieri reparari, aut certa aliqua ratione Abbati facienda, introcant. De caetero nullam licentiam aut libertatem habeant introeundi.

XX. Nul-

XX. Nul-

XX. Nullus infantem de baptismo excipiat.

XXI. Quibus claves de cellario, cannava, horreo, posticio, & oratorio tradendæ sunt, probatæ sint personæ; & desuper altari vel Evangelio eas accipient: scientes se Deo reddituros rationem de ministerio sibi credito.

XXII. In omni ministerio, sive in ordine psallendi, aut legendi, vel operandi, vicibus sibi succedant, absque sancto Abbate; & nimis senibus, & parvulis infantibus, aut certè ita infirmis, ut surgere omnino non possint, non compellantur facere, pro eo quod non prævalent.

XXIII. Artificium verò discendum, aut quælibet opera faciendæ non pro suo libito eligant; sed in arbitrio Abbatis erit, quod utile prospexerit imperandum.

XXIV. Per totum diem cum manibus operantur, meditatio sancta de corde non cesset, propter illud Apostoli: *Colof. 3.* *Psalmis, Hymnis, Cantibus spiritualibus cantantes & Psallentes in cordibus vestris Domino.*

XXV. Nullus præsumat quidquam suum dicere, aut suum proprium vindicare; sed secundum Actus Apostolorum, sint vobis omnia communia; sit vobis anima una & cor unum in Domino.

XXVI. Vestimenta alio colore non induatis nisi laïa, lactina, & nigra nativa.

XXVII. Lectuaria sæcularia de coloribus facta in usu non habeatis. Pallæ holofericæ ad altaria de auro aut de gemmis ornata à vobis nunquam comparentur. Si aliquis de fidelibus pro voto suo obtulerit, & Abbati visum fuerit, aut necessitas exegerit, vendendi faciant usum.

XXVIII. Post matutinas orationes ad somnum reverti non liceat: sed completis matutinis statim dicatur Prima, deinde usque ad horam tertiam omnes lectioni vacent.

XXIX. Ad vigilias dum lectio legitur, aut de sparta aut de canape aut aliud hujusmodi manibus operamini, ut non somnus obrepat. Si verò Dominicus aut festi sunt dies, cui somnus venerit, aliis sedentibus jubeatur stare, ut possit à se somni marcorem repellere; ne in opere Dei aut tepidus inveniatur, aut negligens.

XXX. Signo tacto omne opus prætermittatur, sicut apes prudentissimæ ad alvearium, ita veloci festinatione properare contendite. Si quis tardius venerit, districtioni subjaceat.

XXXI. Dum psallitur, studeant sanctæ animæ vestræ non vagari animo; verum etiam nec operari aut loqui præsu-

mant. Sed psallite sapienter: sicut dixit *Psalm. 45.* Propheta: *Psallam & intelligam.* Et illud: *Psalm. 100.* *Psallam spiritu, psallam & mente.* Metuentest illud: *Maledictus homo qui facit opus Domini negligenter.* *1. Cor. 14.* *Jer. 46.*

XXXII. Literas omnes discant.

XXXIII. Omnes divisim maneant lectulis.

XXXIV. Sanctus Abbas extra congregationem non maneat.

XXXV. Hoc specialius coram Deo monemus custodiri, ut nulli liceat cum alio secretius loqui, aut sedere; præcipue vespertinis & nocturnis horis. Si secretè inventi fuerint, tanquam si crimen admiserint, severissimè distringantur; absque illis, qui probati sunt ætate & sanctitate.

XXXVI. Nulli liceat loqui cum illo qui fuerit excommunicatus, præter illum quem ei sanctus Abbas custodem dederit.

XXXVII. *Obedite prepositis vestris, & subjacete illis: ipsi enim pervigilant pro animabus vestris rationem reddentes Deo.* *Hebr. 13.*

XXXVIII. Si quis pro qualibet culpa, aut transgressione Regulæ increpatur, aut disciplinam accipit, arguenti respondere non præsumat: quia peccatum quod hic distringitur, in æterna examinatione non punitur. Et sic debetis animæ curam excipere, quomodo æger curam medici: tenentes illud sanctæ scripturæ: *Qui abijcit disciplinam infelix est.* Et illud: *Ego in flagella paratus sum.* *Prov. 19.* *Psalm. 37.*

XXXIX. Lites nullas habeatis, obediens præcepto Apostoli, ubi dicit: *Servum Domini non oportet litigare, sed mansuetum esse.* *2. Tim. 2.*

XL. Superbis verò, inobedientibus, & iracundiam protrahentibus nunquam parcendum, donec corrigantur.

XLI. Pro qualibet culpa si necesse fuerit flagelli accipere disciplinam, nunquam legitimus excedatur numerus, id est, triginta & novem.

XLII. Et quamlibet justa disciplina teneatur, tamen secundum illud: *Bonitatem & disciplinam, paternum affectum sanctus Abbas circa omnes teneat, secundum Apostolum; tanquam si nutrix fuerat parvulos suos.* Et, *omnibus omnifacetus sum, ut omnes lucrifacerem.* *Psal. 118.* *1. Thcf. 2.* *1. Cor. 9.*

XLIII. Sancto Abbati non liceat aliquid de facultatibus Monasterii donare aut vendere; nec aliquid contra Regulæ instituta agere. Quod si facere tentaverit, sancto consilio & uno consensu fratrum ex nostro permissio non ei acquiescatis; & hoc fieri nulla ratione permitte; quia causam se ante Deum noverit esse dicturum,

XLIV. Si

XLIV. Si quid verò super fuerit expensis aut usibus fratrum, in auro, aut in vestibus, vel cellario, sanctus Abbas per manus provisoris, aut per quamlibet fidelem personam pauperibus, peregrinis, aut captivis faciat dispensari.

XLV. Vestimenta etiam cum nova accipiunt, vetera Abbati refundant, incipientibus aut pauperibus eroganda.

XLVI. Nullus honorem presbyterii aut diaconatus accipiat, præter Abbatem si voluerit ordinari presbyterum, & unum diaconem, & subdiaconem, quo ipse voluerit, & quando voluerit, ordinandi habeat potestatem. Si verò Deo propitio ita proficeretis, ut aliquis ex vobis ad Episcopatum expetatur, ipse solus egrediatur.

XLVII. Qui verò minoris ætatis sunt, aut vivis parentibus in Monasterium ingrediuntur, chartas tunc facere compellantur, quando ætate probati fuerint, aut res parentum in potestate habuerint.

XLVIII. Convivium nulli, nec Episcopis, nec Abbatibus, nec provisoribus, nec ulli religioso aut laico parenti aut propinquo de hac civitate in Monasterio fiat. Sed si quis, ut assolet, Abbas, aut peregrini monachi prætereuntes advenerint, & monasterio occurrere voluerint, sit in potestate sancti Abbatis, si eos voluerit ad refectorem invitare. Quia indesinenter sanctam charitatem vestram orationi & lectioni insistere, & soli Deo vacare volumus: ideò vos ab hac præparatione aut inquietudine liberos esse præcipimus.

XLIX. Sedentes ad mensam taceant, & lectio quotidie omni tempore dum cibus sumitur, legatur: ut uterque homo, & exterior cibo, & interior verbo Dei reficiatur. Quia scriptum est: *Non in pane solo vivit homo, sed in omni verbo Dei.*

Matth. 4.

L. Sanctus Abbas, nisi inæqualitate faciente, extra congregationem non reficiet.

LI. Carnes in cibo nusquam fumentur. Pulli verò vel cuncta altitia in congregatione non ministrentur: infirmis tantum provideantur, & accipere liceat. Pisces verò certis festivitibus, aut quando sanctus Abbas indulgentiam facere voluerit, tunc procurentur.

LII. Extra mensam communem nec quidquam cibi potusve gustare liceat, absque infirmis, & illis ætatibus, quæ adhuc perennitri indigent.

LIII. Infirmis verò ita obtemperandum est, ut si sancto Abbati justum visum fuerit, etiam cellariolum suum in commune, & coquinam sequestratam habeant: & cura illis vel studium impendatur, donec convalescant.

LIV. Et quia Deo propitio digna & sufficiens vobis facultas collata est, quæ sufficere Monasterio vestro possit, coram Deo & Angelis ejus te sancte frater Abba, & te venerabilis quicumque fueris Præpositus, admoneo, & contestor, ut sanctæ congregationi, quæ Deo inspirante & jubente secundum instituta quæ fecimus regulariter vivit, omnia quæ eis sunt necessaria in vestitu & victu cum sufficientia tribuatis. Quam rem si neglexeritis, & illi cœperint aliquid necessitate compellente murmurare, aut indigere, causam vos ante tribunal Christi noveritis mecum esse dicturos.

LV. Et vos sancta Congregatio, per profectum vestrum, & per Deum omnipotentem conjuro, ut omnia quæ in hac Regula pro remedio animæ nostræ, & pro animarum vestrarum salute constituimus, integra & illibata custodiatis. Et ne per oblivionem aliquid negligatis, semel ea in triginta diebus relegite; id est, in Kalendis.

Explicit.

Ordinem etiam quo psallere debeatis, in hoc libello judicavimus inferendum.

In primo die Paschæ ad tertiam ter Kyrie eleison, psalmi duodecim: id est, quatuor fratres binos psalmos & allelujaticum tertiū dicant: perdictis psalmis Kyrie eleison & Antiphonas sex, Lectiones tres: una de Actibus Apostolorum, alia de Apocalypsi, tertia de Evangelio; Hymnus *Jam surgit hora tertia*, & capitellum; deinde Kyrie eleison. Sic in omni opere Dei tertia vice Kyrie eleison dicite, antequam incipiatis: & Psalmis perdictis & capitello perdicto. Ad Sextam idem numerus psalmodum, antiphona una, hymnus: *Jam sexta sensim voluitur*, lectio Evangelii & capitellum. Ad Nonam

ipse ordo teneatur: hymnus, *Ter hora trina voluitur*. Ad lucernarium directaneus parvulus; id est, *Regna terra can-* ^{Psalm. 67,} *tate Deo, psallite Domino*. Alia die: *Laudate pueri Dominum*: Antiphona tria, Hymnus: *Hic est dies verus Dei*, & capitellum; quem hymnum toto pascha ad matutinos & ad lucernarium dicite. Ad duodecimam inprimis directaneus parvulus: *Sol cognovit occasum suum*. Sex fra- ^{Psalm. 103,} *tres binos psalmos cum suis allelujaticis dicant, Antiphona tria, Lectiones duas, unam de Apostolo, aliam de Evangelio. Ad Nocturnos Paschales ipso numero omnia dicite, sicut in duodecima designavimus.*

vimus. Ad matutinos inprimis directaneum : *Exaltabo te Deus meus & Rex meus.* Inde, *Judica me Deus :* &, *Deus Deus meus ad te de luce vigilo,* cum alleluja. Deinde, *Confitemini Domino,* cum alleluja : inde *Cantemus Domino,* & ipsum sic : postea, *Lauda anima mea Dominum.* *Laudate Dominum quoniam bonus est psalmus.* *Lauda Jerusalem Dominum :* totos tres alleluja, deinde benedictio dicenda est. Post benedictionem. *Laudate Dominum de cælis.* *Cantate Domino canticum novum.* *Laudate Dominum in sanctis ejus :* cum alleluja. *Magnificat anima mea Dominum,* aut cum Antiphona, aut cum alleluja : Hymnum, *Gloria in excelsis Deo :* & capitellum. Et complete matutinos ipso ordine toto Pascha. Sic omni die Dominico, & omnibus majoribus festivitibus, in quibus ab opere vacabitis. Quotidianis verò diebus ad Nocturnos inprimis directaneus dicatur : *Miserere mei Deus secundum magnam misericordiam tuam :* deinde psalmi decem & octo. Antiphona tria parvula, Lectiones Apostoli aut Prophetarum duæ, & capitellum. Completis Nocturnis dicite Matutinos. In æstate, id est, post Pascha usque Kalendas Octobris ipse ordo erit. Sexta feria verò post Nocturnos duæ missæ fiant in æstate, in hyeme tres. Nam Dominica omni tempore & in æstate & in hyeme post Nocturnos sex missæ fiant. Si verò evenerit ut tardius ad vigiliis surgatur, quantum Abbati visum fuerit, tantum legatur. Quando signum fecerit, qui legit sine mora consurgat, ut canonicus missarum numerus possit impleri. A Kalendis verò Octobris alii Nocturni addendi sunt : ad primos dicendum est : *Miserere mei Deus secundum magnam misericordiam tuam :* ad secundos : *Miserere mei Deus, miserere mei,* directaneus dicendus est, psalmi decem & octo : Lectiones duæ de Prophetis, aut de Salomone. Hymnus ad primos Nocturnos : *Rex æternæ Domine.* Ad secundos : *Magna & mirabilia.* Post dictos, quia noctes crescunt, quotidie ad librum facite missas tres. Unus frater legat paginas tres aut quatuor, quomodo mensura fuerit libri : si minutè scriptus, aut majori forma, ternas paginas ; si minor, quatuor : & fiat oratio : iterum legat tantum, fiat alia oratio : tertio legat idem tantum, & surgite, dicite Antiphonam de Psalmis in ordine, postea responsum, deinde Antiphonam. Iterum legat alius frater : & sic impletis tribus missis dicite Matutinarios canonicos ; id est, primo canticum in Antiphona, deinde directaneum : *Judica me Deus. Deus Deus meus ad te de luce vigilo.* *Laudate Dominum quoniam bonus est psalmus.* *Lauda Jerusalem Dominum.* Inde, *Laudate Domi-*
Cod. Regul. Tom. I.

num de cælis. Cantate Domino canticum novum. *Laudate Dominum in sanctis ejus :* in Antiphona dicite Hymnum, *Splendor paterna gloria :* alia die, *Æternæ lucis conditor,* & capitellum, & Kyrie eleison duodecim vicibus. Omnibus diebus quotidianis ita impleatur. Post Matutinos ad Primam duodecim Psalmi dicantur : Hymnus, *Fulgentis auctor ætheris :* Lectiones duæ, una de veteri, alia de novo testamento & capitellum. Post hæc omnes Lectioni vacent usque ad horam tertiam : de reliquo verò diei spatio faciant opera sua secundum illud quod Dominus dixit : *Pater meus usquemodo operatur,* & *ego operor.* Et illud Apostoli : *Operantes manibus nostris.* Et, *Qui non operatur non manducet.* Quia scriptum est : *Vie otiosorum strata sunt spinis.* Et, *servum inutilem projicite in tenebras exteriores.* Quotidianis igitur diebus ad tertiam duodecim Psalmos dicite, Antiphonam, Hymnum : *Jam surgit hora tertia :* Lectionem & capitellum, *Fiat Domine.* Ad sextam sit ipse numerus Psalmorum, Antiphona, Hymnus : *Jam sexta sensim volvitur :* Lectionem & capitellum. Ad nonam ipso ordine dicendum : Hymnus verò, *Ter hora trina volvitur.* Ad lucernarium omni tempore & festis & quotidianis diebus, inprimis directaneus, postea Antiphonæ duæ : tertia semper cum alleluja dicatur : Hymnus una die : *Deus qui certis legibus :* Alia die : *Deus creator omnium,* & capitellum. Ad duodecimam Psalmos decem & octo, Antiphonam, & Hymnum, lectionem. & Capitellum. Quando repausaturi estis, in schola in qua manetis, Completa dicatur : inprimis directaneus, Psalmus nonagesimus dicatur, deinde Capitella consuetudinaria.

Joan. 5.
 2 Thef. 4.
 1. Thef. 3.
 Prov. 15.
 Math. 25.

In natale Domini & in Epiphania tertia hora surgite : dicite unum Nocturnum, & facite sex Missas de Isaia Propheta : iterum dicite secundum Nocturnum, & legantur aliæ sex de Evangelio. In Epiphania ita : in primo unum Nocturnum, deinde de Daniele Propheta facite illas sex Missas, & Nocturnos : & ita de Evangelio sex Matutinos eo ordine, sicut in Pascha scripsimus, aut Dominicis diebus. In Martyrum festivitibus tres aut quatuor Missæ fiant. Primam Missam de Evangelio legite, reliquas de passionibus Martyrum. Omni sexta feria post duodecimam sex Missæ ad librum legantur : & post Nocturnos tres. Omni Sabbato ad Matutinos, *Cantemus Domino :* &, *Te Deum laudamus.* Ad Tertiam tres lectiones : una de Prophetis, alia de Apostolo, tertia de Evangelio dicantur. Omni Dominica post Nocturnos cum prima Missa legitur, id est,

U

refur-

resurrectio, nullus sedere præsumat, sed omnes stent. Alia Dominica alia resurrectio, & sic in ordine totæ quatuor resurrectiones per singulas Dominicas legantur. Post tertiam verò, *Pater noster*, dicite: & psallendo omnes communicent. Sic & in festiuitatibus facite. Missæ verò quando sancto Abbati visum fuerit tunc fiant.

Quando aliquis defunctus fuerit, usque media nocte eum pauci fratres in Oratorio pervigilent, & Missas faciant. Post mediam noctem qui vigilauerunt quiescant, & iterum alii vigilent. Et ponite hoc in noticiam sancto Episcopo, ut eum jubeat ad locum ubi ponendus est, deportari. Sin verò præstare despexerit, de quacunque Ecclesia Clericos rogare, qui eum deducant; & date illis eulogias.

Ordinem etiam convivii huic Regulæ inseruimus.

Cibaria quotidie ad refectorem tria, ad prandium duo, ad cœnam duo. Biberes ad refectorem, id est, in æstate, merum, & tres caldillos; ad prandium tres tantum: ad cœnam in æstate mensibus Junio, Julio, & Augusto ternas; reliquis diebus ad cœnam binas bibant. In festiuitatibus verò, & quando Abbas indulgentias voluerit facere, & cibaria, quantum ipse voluerit, & recentes addantur. Quotidie verò olera caseo & oleo semper condiantur. Biberes binas ad prandium, binas ad cœnam accipiant; si jejunauerint, ternas. Jejunium verò à Kalendis Septembris usque

Kalendas Octobris secunda, quarta, & sexta feria jejunandum est. A Kalendis Novembris usque Domini natale quotidie jejunandum est, absque Sabbato & Dominica, ab Epiphania verò usque Pascha quotidie jejunandum est, absque majoribus festiuitatibus, Sabbato, & Dominica. Post Pascha verò usque Pentecosten, sexta feria tantum jejunandum est. Post Pentecosten, mense Junio, Julio, & Augusto, in potestate Abbatis sit de jejunio aut prandio; sicut viderit possibilitatem fratrum, ita studeat temperare.

Explicit.

AURELIANUS PECCATOR REGULAM HANC IN
Christi nomine instituit.

IN Christi nomine fundatum est Monasterium virorum Dei in civitate Arelateni à sancto Aureliano Episcopo, jubente sanctæ memoriæ Childeberto Rege Francorum, quinto decimo Kalendas Decembris, Indictione undecima: anno * quinto post consulatum Basilii junioris V. C. & Basilica ibidem in honore sanctorum Apostolorum & Martyrum: habetque ibidem reliquias positas; id est, de cruce Domini nostri Jesu Christi,

beatæ Mariæ genitricis Domini nostri Jesu Christi, Joannis Baptistæ & Præcursoris Domini nostri Jesu Christi, Stephani, Petri, Pauli, Joannis, Jacobi, Andreæ, Philippi, Thomæ, Bartholomæi, Matthæi, Jacobi, Simonis, Judæ, Mathiæ, Genesii, Symphoriani, Baudilii, Victoris, Hilarii Episcopi & Confessoris, Martini Episcopi & Confessoris, Cæsarii Episcopi.

(*Ex diptychis ejusdem Monasterii.*)

Simulque precantes oramus etiam Domine pro animabus famulorum tuorum, patrum atque institutorum quondam nostrorum, Aureliani, Petri, Florentini, Redempti, Constantini, Himiteri, Hilarini, Januarini, Reparati, Childeberti, Vultrogotæ, vel omnium fratrum nostrorum, quos de hoc loco ad te vocare dignatus est. Cunctorumque etiam hujus loci memores fidelium, pariterque parentum nostrorum, atque seruentium hujus loci: & pro animabus omnium fidelium famulorum tuorum vel famularum ac peregrinorum in pace Ecclesiæ defunctorum: ut eis tu Domine

Deus noster peccatorum tribuas veniam, & requiem largiaris æternam: meritis & intercessionibus Sanctorum tuorum, Mariæ genitricis Domini nostri Jesu Christi, Joannis Baptistæ & Præcursoris Domini nostri Jesu Christi, Stephani, Petri, Pauli, Joannis, Jacobi, Andreæ, Philippi, Thomæ, Bartholomæi, Matthæi, Jacobi, Simonis, Judæ, Mathiæ, Genesii, Symphoriani, Baudilii, Victoris, Hilarii Episcopi & Confessoris, Martini Episcopi & Confessoris, Cæsarii Episcopi, hæc propitius præstare & exaudire digneris: qui vivis & regnas in unitate Spiritus sancti Deus, in sæcula sæculorum, Amen.